



«Бізге осындай мүмкіндік берген БҚАТУ-ға мың алғыс!»

Жәңгір хан университетінің бір топ студенті академиялық ұтқырлық бағдарламасы аясында шетелдік жоғары оқу орындарында бір оқу семестрі бойына білім алып келді. Төмендегі кейіпкерлеріміз осындай мүмкіндіктің арқасында Польша еліндегі Лодзь қаласында болып қайтқан еді.



Рустем БИГЕЕВ, Индустриалды-технологиялық институтының «Құрылыс инженериясы» мамандығының 3-курс студенті:

– Мен академиялық ұтқырлық бойынша Польша мемлекетінің Лодзь

техникалық университетінде бір семестр білім алып келдім. Ол жакта бізді өте жақсы қарсы алды. Барған сәтте бізді және өзге де мемлекеттерден келген студенттерді жергілікті білім алушылармен таныстырып, өзара танысуға арналған түрлі іс-шаралар ұйымдастырылды. Шетелдік студенттермен танысу біз үшін өте керемет әсер қалдырды.

Семестрдің басы мен соңында бірқатар қиындықтар болғанына қарамастан, оқу процесі қатты ұнады. Ондағы оқыту тәсілдері Қазақстанмен салыстырғанда мүлде өзгеше. Студенттер көбінесе өз беттерімен ізденіп, жеке жобалармен айналысады. Ал оқытушылар тек бағыт-бағдар беруші қызметін атқарады. Лодзь университетіне біздің институттан 3 студент бардык. Әрқайсысымыздың мамандықтарымыз әртүрлі болғандықтан, бөлек-бөлек ғимараттарда оқуға тура келді. Әйтсе де, бізді шетелдік достарымыз жалғызсыратпады. Тек бір ғана түсініксіз болған нәрсе – сабақ кестесі. Кейбір сабақтардың кешкі 17.00-ден 20.00-ге дейін өтетіні қиындық туғызды.



Алеу ИДРИСОВА, Индустриалды-технологиялық институтының «Машина жасау» мамандығының 4-курс студенті:

– Маған Польшадағы студенттерге жасалған мүмкіндіктер мен жеңілдіктер ұнады. Студенттер үйінде тұру құны: бір айға – елу мың теңге. Әрине, Қазақстанмен салыстырғанда қымбаттау. Бірақ бұл – Еуропаның басқа мемлекеттеріне қарағанда айтарлықтай тиімді баға. Жатақханада әр бөлмеде екі студенттен тұрдық. Онда спортпен шұғылдануға да, сабақты тереңдетіп оқуға да жақсы жағдай жасалған.

Шәкіртақы студенттің бір айлық шығынына жетеді деп

айта алмаймын. Бірақ оларға көп жеңілдіктер қарастырылған. Студенттік билетімізді көрсетсек, мәдени орындарда және қалааралық пойыздарда жиі жеңілдіктер жасап тұрды.

Біз, қазақстандық студенттер Лодзь қаласында білім алғанымызбен, Польшаның Краков, Вроцлав, Варшава сынды қалаларын, тіпті көршілес мемлекеттерді аралауға мүмкіндік болды. Осы семестр ішінде әртүрлі елдің студенттерімен танысып, достасу бізге өте жағымды әсер қалдырды. Барлық студенттерге айтарым: академиялық ұтқырлық бағдарламасымен шетелде білім алу, саяхаттау мүмкіндігін жіберіп алмаңыз. Себебі, бұл – сіздің болашағыңыз үшін үлкен инвестиция.



Арухан МАКСУТОВА, Индустриалды-технологиялық институтының «Құрылыс инженериясы» мамандығының 2-курс студенті:

– Польшадағы оқу өз елімізбен салыстырғанда сәл күрделірек. Онда студенттердің тәжірибелік сабақтарына аса мән беріледі. Кейбір пәндер бойынша әр аптаға бір көлемді тапсырма беріліп, оны келесі аптаға дейін орындау шарты қойылады. Ал кейбір пәндерде


белгілі бір жобамен айналысып, семестр бойына оқытушыдан кеңес алу міндеттеледі. Кейін сол жобаны сессия кезінде қорғау керек. Сессия біздегідей 3 апта сайын өткізілмейді. Семестрдің ортасында бір рет қана білімімізді тексереді. Лодзь техникалық университетінде студенттердің білім деңгейін бағалау тәсілдері де ерекше. Біздің ол тәртіпке үйренісіп кетуіміз үшін көп уақыт қажет болды. Сессияда автоматты түрде бағалану тәсілі жоқ. Өздерінің жүйелеріне сай әділ бағалайды. Поляк студенттері қойылған орташа баллға да қанағат етеді. Емтиханды кері тапсыру деген ұғым жоқ.

Польша жұрты өте қонақжай, ашық жандар екен. Оқытушылары да кішіпейіл, кез келген жағдайға түсіністікпен қарайды. Студент болғалы бері алғашқы рет оқытушыдан білмегенімді қысылмай сұраған кезім осы болды. Жалпы айтқанда, елімізде де, Польша мемлекетінде де бір мамандық бойынша білім алсақ та, оқыту мазмұны әлдеқайда бөлек. Ол жактағы білімнің аясы кең деп айтар едім. Оқып келген бес ай ішінде білімімді, өмірлік тәжірибемді толықтырып келгеніме өте қуаныштымын. Осындай мүмкіндік берген БҚАТУ-ға үлкен алғысымды білдіремін!

Қанат БАЯНОВ, Политехникалық институтының «Электрмен жабдықтау» мамандығының 3-курс студенті:

– Біз академиялық ұтқырлық бағдарламасы бойынша тек білім алып қана қоймай, еларалап, жер көріп қайттық. Еуропаның көптеген қалаларына саяхаттап, уақытымызды өте тиімді әрі көңілді өткіздік. Алайда шет елде жүргендіктен, басымыздан қызықты жағдайлар да өтті.

Жаңа жыл қарсаңында достарымызбен бірге «Евротур» арқылы автобуспен әртүрлі елдің қалаларын араладық. Содан жаңа жылды қарсы алу үшін сағат түнгі 23.00-де Францияның Париж қаласындағы «Эйфель» мұнарасына бардық. Алты бала екі-екіден бөлініп, сол жақты аралап жүрдік. Жаңа жыл түні болғандықтан,



адам көп шоғырланып, соның кесірінен байланыс нашарлады. Бір кезде бір-бірімізден көз жазып қалдық. Хабарласайын десек, телефонда мүлде байланыс жоқ. Соның кесірінен, кері қайтатын автобусымыздан да қалып қоюға сәл қалдық. Сол жақты айналып, жүгіріп жүріп, әйтеуір түнгі 01.00-де автобусымызды таптық. Біз үшін бұл есте қаларлық сәт болды.

Жалпы Польшаға барып білімімізді жетілдіріп, тәжірибемізді толықтырып келгенімізге өте қуаныштымыз. Оған қоса, әртүрлі елдердің көрікті жерлерін аралап, тарихымен танысу бізге өте жақсы әсер қалдырды.

Дайындаған Анар НҰРЛАНҚЫЗЫ

Меншік несі:

Жәңгір хан атындағы Батыс Қазақстан аграрлық-техникалық университеті. Газет Қазақстан Республикасының Ақпарат министрлігінде 2004 жылдың 29 қаңтарында тіркеліп, №4651 – Г куәлігі берілген.

Жәңгір хан атындағы БҚАТУ медиа орталығының директоры
Ләззат ҚАЖЫМОВА

Бас маман
Анар НҰРЛАНҚЫЗЫ
Компьютерде беттеуші және дизайнер
Қайрат ИСИМОВ

Газет Жәңгір хан атындағы БҚАТУ-дың медиа орталығында теріліп, беттеліп, Жарнама-баспа орталығында басылады. Газет электронды түрде университеттің интернет ресурстарында таратылады. Тапсырыс: № 553 Қолжазба авторға қайтарылмайды. Деректердің нақтылығына автор жауапты. Мақаладағы

Редакцияның мекенжайы:

090009, Орал қаласы, Жәңгір хан көшесі, 51. Бас ғимарат 206-бөлме 1-42
info_zkatu@mail.ru